

OHR najavljuje smanjenje osoblja, u skladu sa napretkom kojeg je BiH opostigla na putu ka punoj državnosti

Visoki predstavnik je danas najavio osoblju OHR-a da ovoj organizaciji predstoji restrukturiranje i smanjenje koje odražava napredak koji je BiH postigla prema punoj državnosti i normalizaciji u posljednjih nekoliko godina.

Ova reorganizacija podrazumijeva smanjenje osoblja od 25%, te restrukturiranje sjedišta OHR-a i njegovih regionalnih i terenskih ureda kako bi se težište stavilo na prioritetne zadatke koji su još preostali u Planu implementacije misije OHR-a. Oni se u najvećoj mjeri odnose na pružanje pomoći organima BiH u provođenju reformi koje su u zakonskom obliku već donesene ili se upravo donose, za razliku od pokretanja novih inicijativa.

Objašnjavajući restrukturiranje, visoki predstavnik je rekao:

“Činjenica da je OHR u mogućnosti da smanji broj zaposlenih za gotovo četvrtinu pokazatelj je napretka koji je BiH u posljednjih nekoliko godina postigla na putu ka punoj državnosti. To je uvijek bio cilj OHR-a: da bude tu dok BiH ne krene nepovratno ka punoj državnosti i ka Evropi, te da se onda povuče. Još uvijek ima stvari koje se moraju uraditi, ali u tome će sve više i više pomagati Evropska unija. BiH želi da se priključi EU, a EU se obavezala da će vam pomoći. Upravo zato raste i važnost moje uloge specijalnog predstavnika EU. Upravo zato ovaj ured sve više postaje Ured specijalnog predstavnika EU, a ne samo Ured visokog predstavnika. I upravo

zato je EU dala svoje vojne snage koje će krajem ove godine preuzeti mnoge od SFOR-ovih daytonskih zadataka. Ta tranzicija u međunarodnoj zajednici će se nastaviti. Međunarodna zajednica ovdje nema strategiju povlačenja. Ona ima strategiju ulaska, uz pomoć koje će se Bosna i Hercegovina priključiti Evropi. A mi ćemo ostati tu sve dok se taj posao ne završi.”

Visoki predstavnik je rekao osoblju OHR-a da duboko žali što u okviru pomenutog restrukturiranja mora ostati bez velikog broja predanih i nadarenih saradnika. Rekao im je da su najbolji tim sa kojim je ikada imao čast raditi, i da se nada da će bosanskohercegovačka država naći način da iskoristi znanje i talenat koje su ovi nadareni ljudi izgradili i usavršili u toku svog rada u OHR-u.